



## Komunikado

8 di febrüari 2023

### **Cft: “Kambio pa yega na surplus di mas aña ta prioridat prinsipal”**

Willemstad – Kòrsou tin un bon posishon di salida pa realisá surplus di mas aña riba su presupuesto, entre otro a base di e resultadonan importante ku e proyekto pa subi entrada di impuesto ta dunando. Despues di añanan ku défisit presupuestario, Kòrsou su prioridat prinsipal mester ta pa realisá un cambio den direkshon di surplusnan multi-annual. Kolegio di supervishon finansiero Kòrsou i Sint Maarten (Cft) a insistí riba esaki den su kòmbersashonnan residente ku gobièrnu di Kòrsou. Kòrsou ta pará dilanti di e tarea importante pa redusí su debe nashonal pa hiba esaki na un nivel prudente, miéntras ku e riesgonan i inseguridatnan ketu bai a keda mésun grandi. Esaki ta konta prinsipalmente pa kuido i seguridat sosial. Reformanan struktural i invershonnan ku ta stimulá kresementu, den kombinashon ku un maneho presupuestario stringente di mas aña, ta esensial pa por pone e finansa públiko na òrdu.

Na promé instansia ekonomia di Kòrsou a rekuperá lihé di e konsekuensianan di e krísis di korona. Despues di e kontrakshon di 18,4 porshento den 2020, e ekonomia real di Kòrsou a krese ku 4,2 porshento den 2021 i ku 5,9 porshento den 2022, segun e kálkulonnan di Banko Sentral di Kòrsou i Sint Maarten (CBCS). Den 2022 e produkto nashonal bruto nominal a yega bèk na e nivel kaminda e tabata promé ku e pandemia. Pa e aña aki CBCS ta kalkulá ku lo tin un kresementu ekonómiko di 2,7 porshento, miéntras ku probablemente inflashon lo ta 4,5 porshento.

Défisitnan durante di añanan i un debe nashonal kresiente a pone ku finansa públiko di Kòrsou a deteriorá fuertemente. Debe nashonal di Kòrsou aktualmente ta un montante di ANG 4,3 miar, o sea 79 porshento di e produkto nashonal bruto. Kòrsou ta pará dilanti di e tarea importante di hiba e debe nashonal bèk na un nivel prudente, kubri e riesgonan di tantu denter komo pafó di e presupuesto i pone sostenibilidat di finansa públiko na òrdu riba término di mas aña. Pa e motibunan aki realisashon di surplus presupuestario mester ta prioridat number unu, kuminsando na 2023.

#### **Presupuesto 2023**

Fin di aña pasá parlamento di Kòrsou a aprobá presupuesto di 2023. Kòrsou a presentá un presupuesto balansá pa 2023 i 2024, sigui pa surplusnan presupuestario limitá pa 2025 i 2026. Cft a insistí pa Kòrsou realisá surplus presupuestario ya for di den aña 2023 i pa Kòrsou usa e surplusnan aki pa pago parsial di e debe nashonal. Esaki no ta un tarea imposibel, ya ku for di 2021 Kòrsou ta kosechando bon resultado ku e proyekto pa subi kumplimentu ku pago di impuesto (compliance) i optimalisashon di ehekushon di impuesto. Kombiná ku redukshon di gastunan i un maneho presupuestario stringente, ya kaba den aña 2023 Kòrsou lo por hasi e cambio pa yega na surplus presupuestario.

#### **Kuido i seguridat sosial**

Diferente reforma ta nesesario pa dominá e subida di gastu riba tereno di seguridat sosial i di kuido. Ya pa basta tempu Cft a bin ta muestra ku nunca no a implementá e medidanan ku a anunsia na 2021 pa kontrolá e fondo ku ta fluktuá (schommelfonds), i e riesgonan ku esaki ta representá pa presupuesto di pais. Pa aña Kòrsou ta paga un kontribushon di ANG 306 mion na e fondonan sosial i banda di esei e ta obligá pa kubri e défisit den e schommelfonds. Cft a enfatisá ku no solamente Kòrsou lo mester tuma medida riba término kòrtiku pa prevení défisitnan den e schommelfonds, pero tambe e mester introdusí strukturalmente reformanan pa evitá défisitnan di mas aña.



Cft tambe a ekspresá den forma enfátiko su preokupashonnan tokante di e situashon finansiero prekario di Curaçao Medical Center i e hecho ku na ta bini ku akshonnan konkreto. Anteriormente ya kaba Cft a pidi Kòrsou pa bini ku provishon pa esaki den e presupuesto.

### **Reforma i invershon**

Reformanan struktural ku ta inkluí den e Pakete Nashonal (Landspakket) i invershonnan ku ta stimulá kresementu, ta di gran importansia pa reforsá Kòrsou su potenshal di krese i tambe hasi su kapasidat di bòn bèk mas grandi. Cft ta mustra riba e nivel abou di invershonnan públiko i a urgi Kòrsou pa inkluí plannan dirigí di invershon - por ehèmpel riba tereno di infrastruktura físiko – den presupuesto, i pa implementá esaki ku e diligensia nesario. Kòrsou mester hasi uso optimal di e oportunidatnan ku e Pakete Nashonal ta brinda pa ehekutá reformanan ku ta fortifiká su strukturanan. Ku esaki lo hasi e posishon di salida i sostenibilidad di finansa públiko fuerte.

Entrante 1 di febrüari 2023 a nombra señora Lidewijde Ongerling komo presidente di Kolegio di supervishon finansiero di Kòrsou i Sint Maarten, Kolegio di supervishon finansiero di Aruba i Kolegio di supervishon finansiero di Bonaire, Sint Eustatius i Saba. Den su konstelashon nobo Cft a hasi un bishita na Kòrsou di 6 pa 8 di febrüari 2023 i a hiba kòmbersashon ku minister di Finansa, minister di Salubridat, Medio Ambiente i Naturalesa, Konseho di Minister i e Komishon Finansiero di Parlamento. Cft a papia tambe ku gerensia di Banko di Seguro Sosial (SVB), Inspekshon di Salubridat Públiko, direktiva di Curaçao Medical Center i e 'kwartiermaker' di e Grupo di Kòntròl enkargá ku Saneamentu di e entidatnan di CMC (Regiegroep Sanering CMC-entiteiten).

[Fin di komunikado]

**Foto:**

Nathan Roosberg

**Teksto pa foto:**

Reformanan struktural ta di gran importansia pa Kòrsou.

**Nota pa redakshon – no pa publikashon**

Kontakto na Cft:

Sekretariado Kolegionan di supervishon finansiero

Telefòn +5999 461-9081 / +5999 461-9082 / +5999 461-9084

Email [info@cft.cw](mailto:info@cft.cw)

Website [www.cft.cw](http://www.cft.cw)

Persona di kontakto pa prensa:

Jefka Alberto

Telefòn +5999 512-6861